

## FAVOLE MORALI

### FAVOLA I.

#### 'L Vei e i so Fieui.

**U**n pare quasi vsin a fè 'l pachet,  
 Vedend ch' a l' era inutil sgambitè,  
 A ciama i so tre fieui davsìn al let:  
 E com' a l' era un om ch' savia so afè,  
 E ch' ai piasìa 'l ben dij so fieui,  
 S' è fasse un mas d' goret al let portè.  
 Con l' aria dl' stupor dipinta s' j' eui,  
 Tuti 'n faccia tra d' lor a son guardasse,  
 Nen savend cosa fussa coust ambreui.  
 Ma 'l pare spiritos, ch' as n' era adasse,  
 A godia tra chiel internament  
 Sul' scopo dla lession ch' a s' era piasse.  
 E 'l mas d' goret sporsendie chietament,  
 Ai prega d' romplo subit per metà,  
 Prometend una mancia a coul ch' as sent.  
 Ciascun subitament a l' ha cercà  
 Con tuti ij sfors possibil d' adopresse,  
 Ma a gnun j' è riussi d' vedlo troncà.  
 Anlora 'l vei serious senza crussiesse,  
 Ciapand avanti ai fieui 'l mas d' goret,  
 Ai romp a un a un per nen strachesse.  
 Iv trovreve a mia mort al sicuttet,  
 (Sogions 'l pover pare mestament)  
 S' i serche d' separeve e stè solet.....

Che invece, se d'acordi unitament  
 Stareve tuti ansem an santa pas,  
 J'avreve d'andè anans onestament.  
 La riflessione del pare a tuti pias,  
 Ai giuro ai pè del let d'butela 'n pratica,  
 A cost d'dovei perde ancora 'l nas.  
 Meuir 'l pare. A l'union ai ven na siatica,  
 Ciascun veul stè da chiel, veul fè cà neuva;  
 Stame alegra del vei la lunga tattica!  
 I debit, i pastiss del pare as treuva;  
 A sauto tuti fora i creditor,  
 E d'pugn e causs tra frei ai ven na pieuva.  
 J'avocat, i nodar e procurator  
 Ai volo ados rusiand fin ch' ai na j'è.....  
 (Son gent ch' a penso mach per lor)  
 Così ridot al zero i nostr grivoè  
 A regreto trop tard 'l mas d'goret,  
 La lession del papà prima d'cherpè.

*La forza a stà ant l'union; e i' italian  
 Ch' a veulo nen conosse sta virtù,  
 A l'è na cosa certa ch' a faran  
 Perfìn ch' a sdrà mond l'erbo-forcù.*

## FAVOLA II.

'L Ciocon e soa Fomna.

Un om che alegrement a l'ostaria  
 Passava i dì e le neuit a cimpè bin,  
 L'avia trovà a sposè na bela fia,  
 Ch' ai fava nen piasi l'odor del vin,  
 Ne vedlo a rubatè a la strasora,  
 A spende malament i so quattrin.